

中國方志叢書·華北地方·第二五一號

據清·常毓坤修李開甲等纂
清·光緒九年抄本
影印

陝西 省

孝義廳志



成文出版社有限公司印行



10098705

中華民國五十八年 月壹一版

孝義廳志

全一冊

發行人：**黃 成 助**

出版者：**成文出版社有限公司**

台北郵政信箱二二六〇五號
台北市羅斯福路三段279之二號
電話：三七〇一三二號

印刷者：**東南印製廠有限公司**
和平西路二段70巷83弄29號

內政部登記證內版台業字第一一四七號

序

從來事之修廢視乎人人之舉事視乎時時之得為
與不得為又有數存焉得為不為則因循苟且人不
得辭其咎故天下無不可為之事而獨難遇得為之
時也予不敏才識庸陋又荒於學殖然自通籍以
來每勇於任事而恒沮厄於時時予初入闕典華陰
獄職微非得為時丁艱後從軍嗣擢清澗令職得為
也乃未蒞任以迴避對移甘之文縣數年調古浪碾
伯未久擢署階州事非無可為也予亦非憚為也而
十餘年中賊氛蟻擾每到一處軍書旁午災賑頻煩

日勞勞於汚堵撫卹而他不及顧時不得為也洎乎
陞任丹噶爾廳黃池已靖雞犬無驚是時得為也乃
廳處邊徼沙磧斗城惡氓數百戶即欲展布而無所
展布時得為而事不得為也至壬午夏蒙

憲簡改移茲廳廳治介萬山中地曠人稀瘠苦與丹廳
同然密邇有垣昔為首邑巖疆分廳以來人傑輩出
竊謂採風紀事巨牘細列早已成志及索觀則曰無
質諸士夫或曰欲修之而未逮也或曰是因兵燹燬
亡苦無文獻之徵金石之考欲修之而無據也夫今
之無據者非前之人之緩於乘時有以致之歟今旦

無據後更奚賴焉且邦之文獻繫乎志志之修廢存乎人今夫山峙川流地輿之定界也城繕隍陵建置之大端也任土則壤田賦之成規也女貞男義地靈之鍾毓也然而時有否泰治有隆污代有沿革由是人物有盛衰官師有賢否風俗有薄厚物產有贏絀不因其時而志之則無徵不得其人而志之則失實無徵失實則不足備國史之採擇而資學士之考鏡故雖彈丸叢爾不可無志况孝義即山僻而為十里巖疆且自昔在首善方域內哉予用慨然奈下車未久又秋收歉薄未克舉行癸未春適遇重修西安府

志奉

憲檄徵十八屬廳州縣舊志並頒發條例飭各採訪近
事分門別類緝成齋府以便彙成府志予竊喜事會
拾進遂集紳耆而告之曰鑒志既無舊者則須採訪
編緝以應命而藉是以成志事半功倍亦時不可失
焉諸紳耆皆曰然各願捐資為助當即分路採訪事
實徵稽傳聞歷夏秋兩季各以稿冊齋繳咸推予纂
集顧予荒疎昏疎益以案牘煩勞傳世之書曷敢率
爾操觚而地僻資微又難請他方名宿適廳明經李
君開甲余君高詠暨其弟篤寬慷慨請任遂屬之東

筆始於九月成於十月歷六旬而犁然成書授予卒
讀見其刪煩去蕪援古證今既言簡事賅亦法合體
備雖不足以當三長之譽洵亦無愧明經之稱焉蓋
其參訂史乘確考傳聞舉凡有關於斯土者罔敢佚
而叙實闕疑不欲牽引隣事徒為夸張觀美謂非信
而有徵核而不失其實者歟繼自茲溯斯地之文獻
而後有續之者必以斯志為宗於以知斯志之作得
其人且得其時也尤冀後之君子及聽之賢士大夫
諒予之力而鑒予之志焉斯事也開局歷閱月總
事者有人襄事者有人以及捐資助費諸人皆所以

代予之勞而濟成盛舉者也例得同書名以垂不朽
云是為序

光緒九年歲在癸未孝義廳同知海陽常毓坤序

序

古者國各有史嗣後變為志而一邑有志即一邑史也凡地圖疆域民風土俗物產之類皆載此書所以備採擇垂勸懲彰教化而羽翼

盛治也獨孝義設廳最晚又經亂燬茫無舊典創始實難兼之地瘠民貧而鄉曲文人既少世族藏得許多史籍誰是曹倉杜庫之家足堪藉以博稽又難經費賓請二三博士雖有陸海潘江之學更難求其下筆雖有心者擬議草創勢不得不袖手白眼徒浩然而長嘆也光緒癸未夏

廳憲常公蒞任後詢知廳舊無志慨然自任續又適承

憲檄飭修 公遂開局延紳俾令分境採訪經數月無
隱不搜無事或遺公則秉公斟酌取舍允當而謙仰
不自操觚編緝之任屬之鄉紳時歷六旬煥然成篇
凡山川人物疆域形勝昭然在目戶口保甲民風物
產瞭若指掌彬彬乎誠一邑之實錄哉嗚呼以前之
幾百年而論現在稽考無從書若無徵之夏禮由後
之數百年而觀將來憑今作古道猶幸在於斯文所
謂備採擇垂勸懲彰教化而翔贊

盛治者皆在其中矣於鑠乎懿哉

詩

春秋在魯宋在晉文史昭垂幾萬年秦漢以來變為
志民風地界寫真銓一千七百七十國文獻足徵倡
於前寰宇一統廣輿記我

朝重訂久相沿版圖即小從來有孝義簡陋獨不然廳憲常
公謀創始惜無舊籍可乘先新開館局臨書院延請
鄉紳及屬員大訪烟村書節孝遍遊邱壑繪山川搜
羅忠義兼貞烈此地英華盡寫傳勤勞多是邑侯績
百年事實賴以宣他時如有增修者化古為新做舊

篇自愧才疎兼老拙
揣摩不盡大夫賢
聊將俚句歌功德
任爾名流笑我顛

光緒九年歲在癸未梅月訓導柏邑張聯捷序并題

序

粵自書傳禹貢官號職方太師採列國之風外史掌
四方之志黃圖皇覽漢魏具有成書罷國方興唐宋
彌多全帙惟千古之典章既備一方之文獻豈無徵
志也者上闕

朝廷之治化下繫草野之風俗表彰往古風示來茲具所闕
豈淺鮮哉覘茲孝義廳即古雋縣闕自乾隆四十八
年由咸甯鎮安監田分撥地土設立同知形扼緊要
治賈綢繆然治孝義難志孝義尤難治之者行其當
然之事志之者紀其已然之蹟廳城係新設凡所稱

舊蹟皆不屬今廳志之者其能有遺無漏乎其能言
簡意賅乎矧考義無志由來舊矣年將近百父老無
存兵燹疊遭冊籍俱多遺失水災屢被人民散處他
方縱有古碣殘碑而文字缺如既慮稽查之無有又
恐採訪之不真其不信於當時者將何以傳於後世
也且寬等僻處山陬學愧金牛才慙半豹考覈既已
不宏聞見更多不廣以云難誠難矣若因其難而聽
其湮替忽然置之則後之視今尤甚於今之視昔遺
事軼蹟不更湮沒無彰乎茲因

廳侯常老公祖奉

上憲諭續修府志不能使我廳缺焉弗備令寬等編輯
以附志來寬等自知謏陋然責為敢辭不過率爾操
觚聊效採花釀蜜強為學製無非集腋成裘仰體泰
山不讓土壤黃河不擇細流之意第遠稽貴乎近取
援古亦宜徵今選言務去其繁紀事必扼其要採訪
雖出自芻蕘考覈要綜乎經史爰即可知可考者分
門別類閱兩月編輯成書以備採擇雖廳境山僻而
忠孝節義非無足取疆域形勝不無可觀觀城閣之
連雲數百里山雄川秀觀景物之映日卅六保俗美
化純未始非天地之鍾靈山川之毓秀也方今

聖天子恩深雨露化及遐隅異日有適軒采風齊之史館善
勸惡懲庶可感發而興起焉寬等拜視管窺不無掛
漏後之博雅君子具詳參而確證之則幸甚焉

廳恩貢候選教諭李開甲

光緒九年歲次癸未小陽月之吉廳歲貢候選訓導余萬寬今序

廳廩貢即選訓導余萬寬

凡例

一紀表考傳四者史例也志例亦然茲統以志稱之者
下邑之志無所為紀官師選舉皆以兵燹年月多失
改表之纂難改並傳載之即人物咸以志稱之耳

一頒發條例內有

天章一門理應首列奈廳境僻陋無名山顯官故無

御製碑碣即乾隆嘉慶道光平逆獻馘碑文舉天下泮宮皆
勒立者考義獨無至設廳之初既有奏疏必有

上諭乃同治經賊焚燬典籍卷案一空無從稽攷謹闕之
以俟來者